

FONDACIJA CURE NEWSLETTER

Januar – Mart 2026.

U 2026. godinu ušle smo s novom energijom i nastavkom aktivnosti usmjerenih na osnaživanje žena, promociju ljudskih prava i jačanje feminističke solidarnosti. Prva tri mjeseca godine obilježili su edukativni programi, saradnja s partnerima i aktivnosti koje doprinose pozitivnim društvenim promjenama u Bosni i Hercegovini i regiji.



Zajedno za mir: Feministička perspektiva brige za sebe i zajednicu oko sebe

Dana 11. februara u Potočarima/Srebrenici, zajedno s organizacijom Žene u crnom iz Beograda, organizovale smo mirovni susret posvećen prijateljstvu, uzajamnoj podršci, solidarnosti te zajedničkoj borbi za mir i pravdu.

Susret je započeo posjetom Memorijalnom centru Potočari i polaganjem cvijeća kod spomenika žrtvama genocida, zajedno s aktivistkinjama udruženja Anima iz Đulića, Udruženja antifašista i antifašistkinja ANPI te organizacije Žene u crnom iz Udina, Italija, koje su boravile u solidarnoj posjeti Srebrenici.

Tom prilikom promovisana je i publikacija posvećena govoru Munire Subašić, koju su objavile Žene u crnom iz Beograda u decembru 2025. godine. Publikacija podsjeća na značaj njenog obraćanja povodom obilježavanja 30. godišnjice genocida u Srebrenici i predstavlja snažno svjedočanstvo ženskog otpora, hrabrosti, brige i borbe za pravdu.

Od 9. do 10. februara u Bijeljini je održan sastanak članica projektnog tima Inicijative Mir sa ženskim licem, na kojem se razgovaralo o realizovanim aktivnostima te planovima i prioritetima Inicijative za 2026. godinu.

Od 13. do 15. marta u Sarajevu, predstavnica Fondacije CURE je, na poziv Udruženja Romska djevojka – Romani Čej iz Prnjavora, učestvovala na seminaru „Zajedno učimo, zajedno gradimo mir“. Tokom seminara govorila je o izgradnji mira i pomirenju te podršci ženama, s posebnim fokusom na marginalizirane žene, Romkinje i povratnice.



Memorijalni centar Potočari, Srebrenica, 11. februar 2026.



Mirovni susret, Potočari/Srebrenica, 11. februar 2026.



Mirovni susret, Potočari/Srebrenica, 11. februar 2026.



Seminar 'Learning Together, Building Peace Together', Sarajevo, 15-13 March 2026

Jačanje otpornosti feminističke i LGBT*IQ zajednice na antirodni pokret u Bosni i Hercegovini

Od 5. do 8. februara u Sarajevu smo organizovale radionicu za aktivistkinje i braniteljice ženskih i ljudskih prava LGBT*IQ osoba u Bosni i Hercegovini pod nazivom „Zajedno rastemo i gradimo otpornije zajednice“.

Radionica je bila osmišljena kao siguran prostor za razmjenu iskustava, zajedničko učenje i jačanje ličnih i kolektivnih kapaciteta za djelovanje u izazovnim i nesigurnim društvenim kontekstima. Kroz interaktivan program učesnice su imale priliku da se bave temama integracije

sigurnosti u svakodnevni aktivistički rad, prepoznavanja i njegovanja feminističke brige o sebi i zajednici, razvoja kolektivnih strategija za ublažavanje prijetnji i jačanje solidarnosti, kao i izrade ličnih sigurnosnih planova.

Poseban dio radionice bio je posvećen simulaciji online kampanje, tokom koje su učesnice razvijale vještine komunikacije i odgovaranja na provokativna pitanja, s ciljem jačanja otpornosti i sigurnijeg djelovanja u digitalnom prostoru.



Radionica za aktivistkinje i braniteljice ženskih i ljudskih prava LGBT*IQ osoba, Sarajevo, 5. – 8. februar 2026.

Jačanje feminističke zajednice, znanja i solidarnosti

Tokom prvih mjeseci 2026. godine nastavile smo ulagati u jačanje feminističke zajednice, razmjenu znanja, ekonomsko osnaživanje žena i regionalno povezivanje sa partnerskim

organizacijama. Kroz Feministički HUB, edukativne aktivnosti i regionalnu saradnju stvarale smo prostore za učenje, dijalog, solidarnost i zajedničko djelovanje.

Feministički HUB: Učenje i razmjena znanja

U okviru koncepta Feministički HUB stvorile smo prostor za zajednicu, poznat kao feministička učionica, okupljajući aktivistkinje, feministkinje i saveznice* koje djeluju u oblasti rodne ravnopravnosti i rodne pravde te zaštite prava žena i LGBT*IQ osoba. Kroz ovaj prostor razmjenjujemo iskustva, gradimo mreže solidarnosti i doprinosimo jačanju ženskog pokreta u Bosni i Hercegovini.

Feministički HUB predstavlja mjesto za alternativno obrazovanje, promišljanje, aktivizam i razvoj novih inicijativa. Polazeći od uvjerenja da obrazovanje nikada nije vrijednosno neutralno, nastojimo koristiti akumulirana ženska znanja i iskustva kao alat za prepoznavanje i propitivanje institucionaliziranog seksizma, homofobije, rasizma i drugih oblika diskriminacije i nasilja.

Prvo predavanje Feminističkog HUB-a održano je 26. februara, a vodila ga je Zlatiborka Popov-Momčinović. Tema predavanja bila je „Ženski pokret u BiH“, čime smo simbolično obilježile period uoči 8. marta, Međunarodnog dana žena.

Kroz tri tematske cjeline razgovarale smo o značaju društvenih pokreta, historijskom razvoju ženskog pokreta u Bosni i Hercegovini – od perioda austrougarske uprave, preko djelovanja Antifašističkog fronta žena, do savremenih feminističkih inicijativa – kao i o trenutnom stanju i izazovima s kojima se pokreti danas suočavaju. Zaključak susreta bio je da se snaga pokreta gradi kroz povezivanje, solidarnost i kontinuiran dijalog.

Drugo predavanje pripremila je Selma Alispahić, asistentica na Fakultetu političkih nauka Univerziteta u Sarajevu. Tema „Različitost kao naša snaga“ otvorila je razgovor o klasnim, zdravstvenim, dobnim i seksualnim razlikama, kao i različitim identitetskim perspektivama te njihovoj ulozi u osnaživanju žena. Poseban fokus bio je na društveno marginaliziranim ženama, uvažavanju različitih identiteta, potreba i iskustava te važnosti slobode izbora i prihvatanja različitosti. Kroz filozofsku, sociološku i semantičku analizu razgovarale smo o tome kako razlike unutar feminističkog pokreta mogu postati izvor jače solidarnosti i zajedničkog djelovanja.



Feministički HUB: Predavanje „Ženski pokret u BiH“, Sarajevo, 26. februar 2026.



Feministički HUB: Predavanje „Rezultati kao politika“, Sarajevo, 20. mart 2026.



Ekonomsko osnaživanje žena

U saradnji sa LOLA BiH organizovale smo radionicu „Ekonomsko osnaživanje žena kroz ekonomske slobode“ u Općini Novi Grad Sarajevo. Događaj je okupio stručnjakinje, političarke, liderice i nezaposlene žene koje su kroz radionicu i diskusiju razmijenile iskustva te razgovarale o izazovima i mogućnostima

za unaprjeđenje ekonomskog položaja žena u Bosni i Hercegovini. Radionicu je vodio doc. dr. Faruk Hadžić, autor publikacije „Korak po korak do tvoje ekonomske slobode“, prema čijem modelu Fondacija CURE realizuje radionice ekonomskog osnaživanja žena širom Bosne i Hercegovine.

Regionalna saradnja i feministička solidarnost

Od 9. do 13. februara predstavnica Fondacije CURE učestvovala je na regionalnom sastanku u Skoplju, koji je organizovala Fondacija Kvinna till Kvinna. Na sastanku su se okupile predstavnice 19 partnerskih organizacija iz šest zemalja Zapadnog Balkana u okviru programa Democracy and Resilience in the Western Balkans, uz podršku Foreign, Commonwealth & Development Office (FCDO).

Tokom susreta razmjenjivana su iskustva i strategije rada u sve izazovnijim

političkim kontekstima – od borbe protiv rodno zasnovanog nasilja i zagovaranja pravnih reformi do javne mobilizacije, izgradnje savezništava i medijskog djelovanja. Poseban fokus bio je na strateškoj komunikaciji i suprotstavljanju dezinformacijama.

Susret je zaključen definisanjem zajedničkih regionalnih prioriteta: borbe protiv nasilja nad ženama, zaštite braniteljica ljudskih prava, suprotstavljanja antidemokratskim narativima i jačanja podrške feminističkom civilnom društvu.



Regionalni sastanak partnerskih organizacija, Skoplje, 13 – .9. februar 2026.



Regionalni sastanak partnerskih organizacija, Skoplje, 13 – .9. februar 2026.

Kampanja „Zašto sam (ne)sigurna?“

Tokom marta realizovale smo kampanju „Zašto sam (ne)sigurna?“.

Povodom 8. marta, Međunarodnog dana žena, Fondacija CURE pokrenula je online i offline kampanju kojom smo ponovo otvorile pitanje koje ne bi smjelo ostati bez jasnog odgovora: gdje se žene osjećaju sigurno? Kod kuće, na poslu, na ulici, u javnom prevozu ili kod doktora?

Na bilbordima širom Bosne i Hercegovine istaknuta je poruka kampanje kojom smo skrenule pažnju na svakodnevnu nesigurnost i sistemske propuste koji oblikuju živote žena, pozivajući na odgovornost i konkretne promjene.

Za mnoge žene u Bosni i Hercegovini sigurnost i dalje nije podrazumijevana. Istraživanja pokazuju da je gotovo svaka

druga žena doživjela neki oblik nasilja nakon 15. godine života, dok mnoge nasilje nikada ne prijave zbog straha, nepovjerenja u institucije ili društvene stigme.

Za brojne žene svakodnevni život i dalje podrazumijeva osjećaj nesigurnosti i nezaštićenosti. Zato nastavljamo glasno ukazivati na stvarnost u kojoj sigurnost žena nije zagantovana – iako je propisana zakonima, ona često izostaje u praksi.

Zahtijevamo odgovornost institucija i društvo u kojem će sigurnost žena konačno biti shvaćena kao osnovno ljudsko pravo, a ne privilegija.



Kampanja „Zašto sam (ne)sigurna?“, Sarajevo, mart 2026.

Aktivističko naslijeđe – digitalni glasovi mladih za pravdu i sjećanje u Srbiji i BiH

U partnerstvu s Fondacijom „Jelena Šantić“ iz Beograda, Fondacija CURE realizuje projekat „Aktivističko naslijeđe – digitalni glasovi mladih za pravdu i sjećanje u Srbiji i BiH“, koji ima za cilj jačanje svijesti i kapaciteta mladih za suočavanje s prošlošću, borbu protiv revizionizma i negiranja ratnih zločina te promociju mirovnog aktivizma u regionu.

Projekat se posebno fokusira na ulogu žena u mirovnim procesima i osnaživanje mladih osoba (30–20 godina) kroz edukaciju o tranzicionoj pravdi, međuetničkoj solidarnosti i rodnoj perspektivi u mirovnim procesima. Kroz pet tematskih modula učesnici i učesnice razvijaju znanja i vještine iz oblasti tranzicione pravde, aktivizma, digitalnog zagovaranja, storytellinga i vizuelne komunikacije.

U okviru projekta realizuju se i panel-diskusije, škola digitalnog i kreativnog aktivizma „Linkuj promjenu“, izrada autorskih tekstova mladih, izložba strip-umjetnica iz Srbije i Bosne i Hercegovine, kao i regionalna nagrada „Jelena Šantić“, koja odaje priznanje pojedincima, pojedinkama i organizacijama koje doprinose mirovnom aktivizmu i tranzicionoj pravdi. Nagrada simbolizira spoj umjetnosti i aktivizma te doprinosi vidljivosti inicijativa koje grade mir i dijalog u regionu.



INICIJATIVE I PARTNERSTVA

Inicijativa za osnivanje Kuće ljudskih prava Sarajevo

U okviru kontinuiranog rada na jačanju civilnog društva i promociji ljudskih prava u Bosni i Hercegovini, Fondacija CURE, zajedno s partnerskim organizacijama MyRight – Empowering People with Disabilities BiH, Sarajevskim otvorenim centrom i Udruženjem građana i građanki Zašto ne, pokrenula je inicijativu za osnivanje Kuće ljudskih prava Sarajevo. Ova inicijativa ima za cilj stvaranje vidljivog, sigurnog i pristupačnog prostora u Sarajevu koji će služiti kao mjesto susreta, dijaloga i saradnje različitih aktera u oblasti ljudskih prava. Planirani prostor omogućit će organizaciju javnih događaja, edukativnih programa, radionica, kulturnih sadržaja i drugih aktivnosti usmjerenih na jačanje uloge civilnog društva te približavanje tema ljudskih prava građanima i građankama.

U okviru inicijative realizovane su i dvije studijske posjete. Predstavnic i predstavnice Kuće ljudskih prava Zagreb boravili su u Sarajevu 17. i 18. februara, dok su predstavnici i predstavnice inicijative Kuća ljudskih prava Sarajevo od 23. do 25. februara boravili u Zagrebu. Tokom posjete Zagrebu održani su sastanci sa zamjenicom pučke pravobraniteljice i predstavnicima i predstavnicama Ureda pučke pravobraniteljice, predstavnicima i predstavnicama Gradskog ureda za kulturu i civilno društvo, članovima i članicama Povjerenstva za ravnopravnost

spolova i Koordinacije za ljudska prava Skupštine Grada Zagreba, kao i s predsjednikom Skupštine Grada Zagreba u Staroj gradskoj vijećnici.

U martu su inicijativu posjetile predstavnice Human Rights House Foundation iz Osla kako bi pružile podršku kroz razmjenu iskustava i dobrih praksi u upravljanju i razvoju kuća ljudskih prava. Ove posjete dodatno su doprinijele jačanju kapaciteta inicijative i definiranju narednih koraka u procesu uspostavljanja Kuće ljudskih prava Sarajevo.

Kroz ovu inicijativu Fondacija CURE i partnerske organizacije nastavljaju raditi na stvaranju inkluzivnog i održivog prostora koji doprinosi razvoju demokratskih vrijednosti, zaštiti ljudskih prava i aktivnom učešću građana i građanki u društvenim procesima.



Studijska posjeta predstavnika i predstavnica Inicijative Kuća ljudskih prava Sarajevo Zagrebu, Zagreb, 25 – 23. februar 2026.



Studijska posjeta predstavnika i predstavnica Kuće ljudskih prava Zagreb, Sarajevo, 17. februar 2026.



Studijska posjeta predstavnika i predstavnica Inicijative Kuća ljudskih prava Sarajevo Zagrebu, Zagreb, 25 – 23. februar 2026.



Posjeta predstavnica Human Rights House Foundation iz Osla u okviru inicijative za osnivanje Kuće ljudskih prava Sarajevo, Sarajevo, 5. mart 2026.

Feminističko umrežavanje i razmjena znanja

Od 20. do 26. januara učestvovala smo na prvom Gen2 seminaru u Novom Sadu, Republika Srbija, u organizaciji kolektiva MANA. U inspirativnom prostoru OPENS centra susrele smo se s predstavnicama još sedam feminističkih organizacija iz regiona okupljenim oko zajedničkog cilja – razvoja kvir i trans inkluzivne metodologije za rad s djevojkama na temu rodno zasnovanog nasilja.

Kroz razmjenu iskustava, znanja i dobrih praksi, ovaj susret još jednom je potvrdio koliko su solidarnost i zajedničko učenje važni za stvaranje sigurnijih i pravednijih prostora za sve. Ovakvi susreti dodatno nas motivišu da i u 2026. godini nastavimo graditi snažna savezništva i pomjerati granice inkluzivnog i odgovornog rada u regionu.



Učešće na prvom Gen2 seminaru u organizaciji kolektiva MANA, Novi Sad, 26. – 20. januar 2026.



Zaštita stečenih prava žena i jačanje rodne ravnopravnosti

Od 12. do 13. februara u Sarajevu predstavnica Fondacije CURE aktivno je učestvovala na radno-konsultativnom sastanku Agencije za ravnopravnost spolova BiH i Ministarstva za ljudska prava i izbjeglice BiH.

Cilj sastanka bio je razmjena informacija o postignutim rezultatima u prethodnom periodu te identifikacija rješenja za prevazilaženje uočenih izazova u radu nevladinih organizacija s institucionalnim i vaninstitucionalnim partnerima u procesu ostvarivanja ravnopravnosti spolova u Bosni i Hercegovini.

Poseban fokus stavljen je na zaštitu stečenih prava žena u Bosni i Hercegovini i unaprjeđenje mehanizama njihove zaštite, održivost organizacija civilnog društva, kao i na izazove koje predstavljaju retrogradni pokreti koji mogu negativno uticati na dostignute standarde u oblasti ljudskih prava i rodne ravnopravnosti.

Radno-konsultativni sastanak Agencije za ravnopravnost spolova BiH i Ministarstva za ljudska prava i izbjeglice BiH, Sarajevo, 13–12. februar 2026.



Tri decenije nakon Dejtona: Žene i društvene promjene

Dana 18. februara, u organizaciji SPKD Prosvjeta – Kluba žena „Mis Irbi“, predstavnik Fondacije CURE učestvovala je na tribini „Tri decenije nakon Dejtona: Žene i društvene promjene“.

Razgovaralo se o historijatu ženskog pokreta u Bosni i Hercegovini i bivšoj Jugoslaviji, međunarodnim dokumentima, pravnom okviru Bosne i Hercegovine te institucionalnim mehanizmima za ostvarivanje ženskih prava.

Istaknuta je važnost dokumentovanja feminističkog djelovanja i bilježenja doprinosa žena društvenim promjenama. Tim povodom predstavile smo nekoliko publikacija Fondacije CURE koje donose priče o ženama, njihovim iskustvima preživljavanja, otpora i svakodnevnog života u Bosni i Hercegovini.



Učešće na tribini „Tri decenije nakon Dejtona: Žene i društvene promjene“ Sarajevo, 18. februar 2026.

Mladi za demokratiju i ljudska prava

Povodom Međunarodnog dana žena, u martu smo u Srednjoj školi primijenjenih umjetnosti u Sarajevu, u okviru časa „Obrazovanje za demokratiju i ljudska prava“, razgovarale s učenicama i učenicima o demokratskim vrijednostima, društvenoj odgovornosti i položaju žena u savremenom društvu.

Kroz interaktivnu razmjenu otvorena su pitanja o izazovima, preprekama i problemima s kojima se žene suočavaju, kao i o važnosti aktivnog učešća mladih u izgradnji pravednijeg i inkluzivnijeg društva. Ovakvi susreti iznova potvrđuju da su učenice i učenici zainteresovani za promišljanje ovih važnih tema te spremni da ih sagledavaju kritički i odgovorno u otvorenoj i inspirativnoj atmosferi.

Umjetnost i solidarnost u podršci ženama

Dana 7. marta u Bošnjačkom institutu u Sarajevu učestvovala smo na kulturno večeri Ambasade Palestine, održanoj povodom Međunarodnog dana žena pod nazivom „Posvećenost palestinske i bosanske žene kroz umjetnost i solidarnost“, na poziv ambasadorice Države Palestine Silvije Abu Laban.

Ambasadorica je održala inspirativan govor o ženama koje teret rata često nose u većoj mjeri nego muškarci, naglašavajući da Međunarodni dan žena nije samo prilika za obilježavanje, već i za priznanje, poštovanje i afirmaciju uloge žena u društvu.



Kulturno večer Ambasade Palestine, Sarajevo, 7. mart 2026.



Nasilje nad ženama: između prava i društvene odgovornosti

Dana 10. marta u Rektoratu Univerziteta u Sarajevu, povodom Međunarodnog dana žena, održan je naučni skup „Nasilje nad ženama: između prava i društvene odgovornosti“, na kojem je predstavnic Fondacije CURE aktivno učestvovala zajedno s predstavnicima i predstavnicama akademske zajednice, pravosudnih institucija, međunarodnih organizacija i organizacija civilnog društva.

Na skupu je istaknuto da Bosna i Hercegovina posjeduje razvijen pravni okvir za zaštitu žena, ali da ključni izazov i dalje predstavlja njegova dosljedna primjena, kao i društvena tolerancija prema različitim oblicima nasilja. Program je bio organizovan kroz četiri tematska panela, a predstavnic Fondacije CURE govorila je o povezanosti umjetnosti, aktivizma i kulture sjećanja u borbi za ženska ljudska prava.

Promocija knjige Lepe Mladenović o traumi i seksualnom nasilju

Dana 25. marta u Sarajevu, u saradnji s Fakultetom političkih nauka Univerziteta u Sarajevu, održale smo promociju knjige naše drugarice Lepe Mladenović „Emocije menjaju rad mozga: Feministički pristup neurobiologiji traume silovanja“.

Kroz osnažujući razgovor s autoricom, dugogodišnjom feministkinjom i aktivistkinjom iz Srbije, koji je moderirala profesorica Sanela Bašić, otvorile smo važne teme seksualnog nasilja, traume i društvenih mehanizama koji doprinose njegovoj normalizaciji i prešućivanju. Posebno je istaknuto da seksualno nasilje ostaje mnogo rasprostranjenije nego što se javno priznaje te da, uprkos njegovoj

učestalosti, i dalje često ostaje obavijeno šutnjom, stidom i nepovjerenjem prema institucijama.

Razgovarale smo o načinima na koje se seksualno nasilje manifestuje unutar akademskog prostora, gdje hijerarhije moći često omogućavaju njegovo prikrivanje, ali i u svakodnevnom životu – u javnom prostoru, porodičnom okruženju i drugim društvenim kontekstima. Ukazano je i na uticaj patrijarhalnih obrazaca koji i dalje oblikuju društvene odnose, doprinoseći normalizaciji kontrole nad ženama i njihovim tijelima te ostavljajući dugotrajne posljedice na živote žena.

Učesce na naučnom skupu „Nasilje nad ženama: između prava i društvene odgovornosti“, Sarajevo, 10. mart 2026.



Promocija knjige „Emocije menjaju rad mozga: Feministički pristup neurobiologiji traume silovanja“, Sarajevo, 25. mart 2026.



Građanke za ustavne promjene: rodna perspektiva u ustavnim reformama

U okviru aktivnosti Inicijative Građanke za ustavne promjene održana je sesija sa studenticama i studentima Pravnog fakulteta Univerziteta u Sarajevu u okviru predmeta „Rod i pravo“, koji vodi prof. dr. Amila Ždralović.

Predstavljen je rad Inicijative s fokusom na ustavne reforme iz rodne perspektive, rodno osjetljiv jezik i uključivanje građanki i građana u procese odlučivanja. Kroz razgovor je predstavljen i vodič „Od Ž(ena) do A(mandmana) – Vodič kroz Ustav“, koji na pristupačan način približava pitanja ustavnih reformi i rodne ravnopravnosti.

Istovremeno, javni prostor i dalje svjedoči izostanku ustavnih promjena koje bi eksplicitno garantovale rodnu ravnopravnost. Novinarica Rubina Čengić u tekstu „Rodna ravnopravnost

na čekanju“ ukazuje na činjenicu da Bosna i Hercegovina, uprkos postojećim preporukama i upozorenjima međunarodnih tijela, još uvijek nije usvojila takve izmjene.

Kako bi skrenula pažnju na značaj rodne perspektive u ustavnim i zakonskim reformama, Inicijativa je 11. marta 2026. godine uputila dopis Radnoj grupi Vijeća ministara BiH, tražeći uvođenje rodno osjetljivog jezika te ističući njegovu važnost za vidljivost žena i ostvarivanje stvarne ravnopravnosti.



Promocija knjige „Emocije menjaju rad mozga: Feministički pristup neurobiologiji traume silovanja“, Sarajevo, 25. mart 2026.



SUSRETI, UČENJE I JAČANJE KAPACITETA

Razgovor o nasljeđu rata, sjećanju i traumi

Dana 17. februara ugostile smo Sarah Škorić, spisateljicu iz Belgije. Rođena i odrasla u Belgiji, Sarah vodi porijeklo iz Dalmacije u Hrvatskoj i već godinama istražuje historiju, kulturu sjećanja i posljedice ratova na prostoru bivše Jugoslavije.

Tokom susreta razgovarale smo o tome kako rat ostavlja tragove unutar porodica i zajednica, na koji način se oblikuju sjećanja te kako se ljudi nose s traumom i rekonstruiraju svoje živote nakon nje. Poseban fokus bio je na iskustvima mladih generacija, žena i queer osoba u kontekstu rata i postratnog društva.

Jačanje internih kapaciteta kroz digitalnu sigurnost

Od 28. do 29. januara organizovale smo radionicu digitalne sigurnosti za članice tima Fondacije CURE. Tokom dvodnevog treninga bavile smo se zaštitom podataka, digitalnom privatnošću i sigurnošću u online prostoru, s posebnim fokusom na izazove s kojima se suočavaju aktivistkinje i organizacije civilnog društva.

Radionicu je vodila Fernala Sejmen-Banjac, koja je s nama podijelila praktična znanja i alate za prepoznavanje sigurnosnih rizika, zaštitu komunikacije

i unapređenje digitalnih praksi u svakodnevnom radu. Kroz interaktivne sesije i razmjenu iskustava dodatno smo osnažile kapacitete tima za sigurnije i odgovornije djelovanje u digitalnom okruženju.

U vremenu kada su digitalni napadi, online uznemiravanje i zloupotreba ličnih podataka sve prisutniji, kontinuirano ulaganje u digitalnu sigurnost predstavlja važan dio brige o organizacijskoj otpornosti i sigurnosti aktivistkinja.

Osmomartovski marš 2026. Sigurnost žena je javna obaveza. Država koja se ne miješa – odobrava nasilje.

U Sarajevu je 8. mart obilježen snažnim protestnim Osmomartovskim maršem pod sloganom „Sigurnost žena je javna obaveza“. Organizacija marša nije bila jednodnevni događaj, već rezultat višemjesečnog intenzivnog rada, koordinacije i zajedničkog planiranja aktivistkinja okupljenih oko zajedničkog cilja – borbe protiv nasilja nad ženama i zahtjeva za odgovornijim djelovanjem institucija.

Poseban fokus bio je na tome da se 8. mart ne posmatra kao simboličan datum, već kao politički i društveni trenutak otpora i zahtjeva za promjenu. Tokom marša naglašeno je da Bosna i Hercegovina, iako posjeduje uspostavljen pravni okvir za zaštitu žena, uključujući zakonsko prepoznavanje femicida i određene mjere zaštite, i dalje bilježi ozbiljne propuste u njihovoj dosljednoj i pravovremenoj primjeni.

Ukazano je na činjenicu da žene i dalje bivaju izložene najtežim oblicima nasilja čak i nakon što ga prijave, što jasno govori o sistemskim propustima i nedovoljno efikasnoj institucionalnoj reakciji. Kada institucije ne djeluju pravovremeno i odgovorno, zaštita ostaje samo formalna, a odgovornost se gubi unutar sistema.

Posebno je naglašeno da svaka ignorisana prijava, svaka odgođena mjera zaštite i svako prebacivanje odgovornosti između institucija dodatno ohrabruju nasilje i produbljuju osjećaj nesigurnosti kod žena. Ukazano je i na činjenicu da rodno zasnovano nasilje ne obuhvata samo fizičko nasilje, već i psihološko nasilje, prijetnje, kontrolu, ekonomsku zavisnost i dugotrajno življenje u strahu.

Jedna od ključnih poruka marša bila je da ravnopravnost bez sigurnosti ne postoji te da sigurnost žena nije privatno pitanje niti individualna odgovornost, već javna i institucionalna obaveza države. Sigurnost je predstavljena kao temelj slobode, dostojanstva i ravnopravnosti, bez kojeg nijedno drugo pravo nema puni smisao.

Kroz transparente, javne govore, zajednički performans i pjesmu koju su učesnice snimile, ovogodišnji Osmomartovski marš bio je snažan izraz solidarnosti, otpora i zahtjeva za promjenom.

Poruka koja je obilježila cijeli događaj bila je jasna: sigurnost žena mora biti prioritet institucija, a svako nepostupanje ima stvarne i teške posljedice. Osmomartovski marš ostaje politički zahtjev za život bez nasilja, jer bez sigurnosti nema slobode.



U naredna tri mjeseca očekuje nas dodjela regionalne nagrade „Jelena Šantić“, koja odaje priznanje pojedincima, pojedinkama i organizacijama iz Bosne i Hercegovine i Srbije za izuzetan doprinos mirovnom aktivizmu i tranzicionoj pravdi.

Nagrada slavi spoj umjetnosti i aktivizma te ističe one koji svojim djelovanjem doprinose izgradnji mira, dijaloga i kulture sjećanja u regionu.

Hvala svima koji podržavaju rad Fondacije CURE i zajedno s nama doprinose izgradnji ravnopravnijeg i pravednijeg društva.

DONATORKE I DONATORI

The Kvinna till Kvinna Foundation (KTK), Global Fund for Women (GFW), TRAG Fondacija, Women's World Day of Prayer (WWDP) – German Committee, Heart and Hand Fund

PARTNERSTVA


Fondacija Jelena Šantić, Srbija
Helsinški odbor za ljudska prava Banja Luka, Bosna i Hercegovina



**Uključi se u radionicu.
Dođi na marš.
Podijeli ovu priču.
Podrži rad Fondacije CURE.**

**Tvoje prisustvo, tvoja riječ, tvoja podrška
– znače promjenu.**

PRATITE NAS I PRIKLJUČITE NAM SE!

 +387 33 207 561

 info@fondacijacure.org

 fondacijacure.org

 fondacijacure

 @fondacijacure

 @Fondacija_Cure

 Fondacija CURE